

Samhliða birtingu þjóðhagsreikninga fyrir annan ársfjórðung í september sl. kynnti Hagstofa Íslands endurskoðun eldri gagna. Auk reglubundinnar endurskoðunar á nýlegum tölum þjóðhagsreikninganna var kynnt öllu umfangsmeiri endurskoðun einkaneyslu. Grundvöllur endurskoðunarinnar var endurbætt aðferðafræði við mat á nokkrum af undirliðum einkaneyslu. Liðurinn önnur fjármálaþjónusta var endurskoðaður aftur til ársins 1997 en útgjöld til trygginga auk viðbótarliða, þ.e. útgjöld Íslendinga erlendis og útgjöld erlendra manna hérlendis, voru endurskoðuð aftur til ársins 2013.

Framan af tímabilinu eru áhrif endurskoðunarinnar á einkaneyslu frekar hófleg en á árunum 1997-2008 mældist hún nú að jafnaði um 0,3% meiri á ári en fyrri tölur sögðu til um. Áhrifin aukast svo umtalsvert árið 2009 en samdrátturinn sem varð í kjölfar fjármálakreppunnar er nú talinn vera 0,8 prósentum minni en fyrri tölur höfðu gefið til kynna (mynd 1).

Einkaneysla síðustu þriggja ára er einnig talin hafa vaxið hraðar eða um 0,2-0,4 prósentum meira á ári en áður var talið. Uppsafnað er einkaneyslan rúmlega 2% meiri í fyrra en fyrri tölur höfðu bent til og hlutfall einkaneyslu af landsframleiðslu hækkar það ár úr 49,0% í 49,5%.


Endurskoðunin hefur einnig bein áhrif á hagvaxtarþróun tímabilsins. Til viðbótar við áhrif endurskoðunar á einkaneyslu verður hagvöxtur árána 2015 og 2016 fyrir umtalsverðum áhrifum af reglubundinni endurskoðun þjóðhagsreikninga, einkum á fjárfestingu og utanríkisviðskiptum. Hagvöxtur undanfarinna þriggja ára er nú talinn 0,2 prósentum meiri en fyrri tölur gáfu til kynna og mælist hagvöxtur í fyrra því 7,4% sem er þriðji mesti hagvöxtur á einu ári hér á landi undanfarinn aldarfjórðung. Þá er samdrátturinn í kjölfar fjármálakreppunnar metinn minni en áður var talið: nú er talið að landsframleiðslan hafi dregist saman um 6,5% árið 2009 í stað 6,9% í eldri tölum. Samdrátturinn árið 2010 er hins vegar metinn óbreyttur eða 3,6%. Uppsöfnuð áhrif endurskoðunarinnar á landsframleiðslu síðasta árs eru að raunvirði hennar var 1,2% meira en fyrri tölur sögðu til um (mynd 2).

## Rammagrein 4

### Nýleg endurskoðun þjóðhagsreikninga

Mynd 1


Áhrif endurskoðunar á vöxt einkaneyslu og hagvöxt<sup>1</sup>



1. Mælt sem mismunur á ársbreytingu nýrra og eldri gagna.  
Heimildir: Hagstofa Íslands, Seðlabanki Íslands.

Mynd 2

Breyting landsframleiðslu og áhrif endurskoðunar undirliða



Heimildir: Hagstofa Íslands, Seðlabanki Íslands.